

Pahhi Catêjê Pê XAWRÔ ME TAWI

Ûhÿ, pê Xamer pê Pahpãm jarkwa to ihcakôc catêjê nõ, ne cupê me toihhimpej catê cahhur. Cwÿrjapê ri hõ kàhhôcpijakrut itajê japrÿ te **Mam Xamer Jõ Kàhhôc** (1 Xamer) ne **Hapu Na Xamer Jõ Kàhhôc** (2 Xamer). Ne Pahpãmte Xamer te Xawrô pê Ixaher catêjê jõ pahhi na hãm na hÿjahkre. Ne ihkàhhôc ita hanea ne Tawi to ihcakôc.

*Xamer pê Pahpãm jarkwa to ihcakôc catê
1 Xamer 1.1-28; 2.18-21*

Pê Ixaher catêjê xÿmre nõ ita japrÿpê Ercãn. Ne pê ihprõ ajkrutatajê japrÿ pê Anakwÿj me Penkwÿj. Pê Penkwÿj mã mehkra, ne Anakwÿj pêihkra nare, ne ihkrechrà. Pê ajco caku cunea kam Ercãn me, mehkra cunea krÿ cati nõwÿr me pra, Pahpãm mã cute me ampo jõr prãmte. Ne Ercãn pê ajco ihtÿjmehkra mã cute ampo jõr xà atajê gõ. Pê ihkÿnte Anakwÿj pê ihkra nare, cute cumã ampo jõr xà na. Pê Penkwÿj ajco Anakwÿj curê to ipa, ihkranare kam, ne ajco cumãn kêanre.

Pê caku cunea kam ajco to hajÿr to xa. Pê Anakwÿj ajco nee hàpàn nare, necama ajco apu amrã. Pê Ercãn hõtpê ajco ihcukij ne cumã:

— Anakwÿj, ampo na mã ca apu amrã, ne nee gápàn nare, ne cama apu apec? Xàwa akra te tej

xà jirôa pê ato impej xà ata na amã ikĩn nare? — hane.

Mã amcro nõ na ma hipêr krĩ cati ata wÿr me mõi, mã ma Anakwÿj ampo kà te Pahpãnto me amji kam hapac xà jÿrkwa wÿr hâr, cute Pahpãm na hàhwÿr prãmte. Mã Pahpãm mã mehcajrên catê pê Eri ata jÿ, harkwa mã mencjêj xàna, ne Anakwÿj pupu. Mã cumã amji kĩn nare, ne ihpeacre, mã cute Pahpãm mã ihcakôc na cumã amji ton, ne cumã:

— Ýhÿ, cõjkwa jõi Pahhiti carõt tÿjti ita, ca haate ipupun, ne ito amji japackre, ne imãikra xÿmre nõ jõi na, wa ha hacpÿa mã amã cugõ, quê ha cupê amãhãpên catê rohnÿtti mã — hajÿr.

Mã Eri te harkwa kà pupun, mã ihtÿj amji cahhy, ne nee ihcakôc nare. Ampo na? Amji caxwãm pê Pahpãm mã ihcakôc na ri. Mã Eri apu ipipãn na ihcãmji, ne cute cumãn to:

— Pìxõ cacõ xÿre to akõm jicu! — hajÿr.

Mã cumã:

— Wa nee apu ipipãn nare, ne cama ipeacre, na wa apu Pahpãm mã amji jarẽ, ne apu ahna ahwÿ — hane.

Mã Eri cumã:

— Hã, apej pëa mã mõi. Quê ha Pahpãm ihtÿj amã gãhwÿr xà itagõ — hane. Mã cute amji jaxàr. Jirô pê mãri jÿ mã me ahna amcro te, mã ma cute me amji jaxàr, me hõi krĩ wÿr.

Mã Pahpãm te cute ahna hàhwÿr xà ata to amji japackre, ne cumã ihkraxÿmre ita jõi. Mã cumã ihpÿm, mã cute cumã haprÿ to Xamer, nehaprÿ ata kõt harën xà te “Pahpãm te ipar”.

Pê cormã Xamer incuire, na pê nee hacpỹ mã krĩ cati wỳr me to amjijaxàr nare to me caku to cwat. Jirô pê mã ri ma inxi me hũm to mỗ, porcuri Pahpãm to amji kam hapac xà jũrkwa kam, Eri apu ipa ata wỳr. Ne peaAnakwỳj te Eri mã amji jarẽn ne cumã:

— Ipê, por pê pyjê nỗ hĩ cuneapeacre to Pahpãm mã ihcakôc, ne ihkra naahwỳ ata. Mã Pahpãm te imã ikra ita jôr, wa hacpỹa mã cumã hõr tomỗ. Cute ita ri, hàpên xà ita to cumã hàpên ita kam ahnaa ihwej xà caxuw — hajỹr.

Mã Eri te Pahpãm mã, Anakwỳj me, impjên cajrẽn. Mã impjên me ajwarPahpãm mã increr jirô pê mã ri cute me amji jaxàr, me hõ krĩwỳr, ne curia cute me Eri na Xamer juwahi. Pê Pahpãm hipêr Anakwỳj mã ihkra xũmre toincrê ne cugỗ, ne cumã ihkra cahãj to ajkrut ne cugỗ.

Pê Xamer ajco Eri tehcajpar to ipa, ampo kà te Pahpãm jũrkwa kam hàpên xà atajê cunea na. Ne ajco ihkà impejti to ihkà, pê inxi caku cunea kam, ajco cumã hitô kàkrare to ipa, impjên pê Ercãn me ipa xà ata kam.

Hõhõ, pê intuwre ata to ipijapar to me hane, ampo kà te Pahpãm to me amji kam hapac xà jũrkwa kam.

3

Pê Pahpãm Xamer cukij

1 Xamer 3.1-20

Pê ramã Eri ihwej ne ajmãr into tũm, ne ramã into puror. Ne amcro nỗ naramã hõt xà caxuw nõr. Mã Xamer ampo kà te Pahpãm jũrkwa kam

nõ ne gõr, pĩ pote Pahpãm jàmçjên xà cahê na.
Mã Pahpãm te Xamer cukij ne cumã:

— Xamer, Xamer — hajÿr.

Mã Xamer cumã:

— Ampo? — hane, ne ma Eri wÿr tẽ ne cumã:

— Ampo? Wa ramã ita ri xa. Xà ca apu icukij? — hane.

Mã Eri cumã:

— Hacıÿ mã amji jaxà, anõr xà wÿr. Wa nee apu amã ijàkjêrnare — hane. Mã ma Xamer te amji jaxàr.

Mã Pahpãm te hipêr ihcukij, ne cumã:

— Xamer! — hajÿr.

Mã Xamer hipêr hÿr ne ma Eri wÿr tẽ ne cumã:

— Ampo? Xà ca apu icukij? — hane.

Mã Eri cumã:

— Quê, wa nee apu acukij nare. Hacıÿ mã amjijaxà, anõr xà wÿr — hane. Mã ma cute amji jaxàr.

He pê cormã Xamer kam Pahpãm jarkwa hamreare, ne nee cormã Pahpãmjahkre pej nare. Mã Pahpãm te hipêr ihcukij, mã ma hipêr Eri wÿr tẽ ne cumã:

— Ca ate ampeaj kam imã gækjêr, na wa ramã acuna mã xa — hajÿr.

Mã Eri te Pahpãm te ramã apu Xamer tuwre ata mã hàkjêr na hahkre pej, ne toihhimpej ne cumã:

— Anõr xà wÿr tẽ ne kam nõ. Quê hipêr jũm acukij, ca cumã: “Pahhiti, pom ipê amã ijapên catê ita, gapacta ne acakôc, wa ha itÿj akampa” — hajÿr. Mã ma Xamer te amji jaxàr ne tẽ ne nõ.

Mã Pahpãm te hipêr ihcukij, ne cumã:

— Xamer, Xamer! — hajÿr.

Mã cumã:

— Pahhiti, pom ipê amã ijàpên catê ita, gapacta ne acakôc, wa ha itÿj akampa — hane.

Mã Pahpãm cumã:

— Wa ha Eri na mehkwy kam apu ampo to kêanre ne. Ne por pê waramã me cumã ampo cawpa, ata to wa ha mehkwy cuneato hamre tu. Ampo na? He Eri kra xÿmre ipijakrut itajê te ramã mehkên ton xà ita te ihhêj ne ramãamehtÿmti. Ne ame to kêanre ita kam, jÿ mã wa ha me to, ne hacpÿmã me to ihtetet? Ramã mehtÿm ita te me hirô pê ihpÿm tu! — hane.

Mã irarà, mã Xamer te Pahpãm te ampo to cumã hÿjarên atajê cuneato Eri mã hÿjarên partu.

Mã Eri cumã:

— Ita na ri Pahpãm mã me to prãm — hane.

Pê Xamer ihkà to mō, pê Pahpãm pê Pahhitia ajco cape na apu ipa. Nepê mehkwy cunea ihtÿj harkwa na me kampa. Ampo na? Pê ajco Pahpãmjarkwa to pit mã, me cumã ihcakôc, na pê ajco me kampa.

4

Pê Piritew catêjê me amji mã Pahpãm jàmcyjên xà pytà

1 Xamer 4.1-18

Pê caku ata jō amcro atajê nō na, Ixaher catêjê me Piritew catêjêipijapu kam tē. Mã Piritew catêjê te Ixaher catêjê jō krähtare to mirte cwat ne mehcuran. Mã ma hacpÿ mã mehkwy te me

amji jaxàr, por curi mehÿr xà ata wÿr, ne me cator.

Mã Ixaher catêjê pê prohkam cute meamji cukij, ne me amji mã:

— Ampo na mã me Pahpãm te me pahna Piritew catêjê jamãr, mã cute mepahkwÿ jipej? Hacme, ne me Pahpãm jamcjên xà to ajpên me mõi, ne mame papijapu xà wÿr me to mõi, quê ha hàmcjên xà ata ihtÿj mepahcurê xwÿn pê me pahpytà — hajÿr.

Ne ma cute Pahpãm jamcjên xà wÿr mehku-jahêc, mã me cator. Mã Eri kra xÿmrepìjakrut atajê te me ahna hàhwÿ ne ma me ipijapu xà wÿr me to tẽ.

Ne pê ihhêj ne Pahpãm jamcjên xà ita to pit mã me amji mã mehhimpej, ne nee Pahpãm to amji mã mehhimpej nare. Ne hàmcjênxà to me cator pêê mã, Ixaher catêjê kÿj catipêa mã ame caràr, me hakryte.

Mã Piritew catêjê ihtÿj ame Ixaher catêjê jõ Pahhiti te me ipijapu na mehtehcajpar naame cãmji, ne ame amji mã hÿpa. Ne hacpÿma mã Piritew catêjê te me kam ihtêm, ne ihtÿj me hapu, ne mehcura. Ne cute me to mir te trînta ne mehcuran. Ne hanea ne cute me Eri kra xÿmre itajê ajwar mehcuran. Mã mamehcahur me hÿrkwa wÿr me cupê ame pra. MãPiritew catêjê ma me Pahpãm jamcjên xà to me mõi.

Mã Ixaher catêjê nõ pyxit ne ma Eri jõ krî wÿr cumã hÿjarên to tẽ. Ne ihtêm ita kam cute ajkamhapac xà te apu amji pê ihkà cokjêr, ne apu amji tÿm, ne Eri wÿrcator. Mã ramã Eri pry jahkà kam ihkrî xà ata na jÿ.

Mã hũjarĕn catê ata cator, ne cute cumã me ipijapu xà atajê jarĕn to hajÿr:

— Wa ita kam ma ajpĕn me ipijapu xà pê tĕ. Ne Piritew catêjê te mepahkwÿ jipej tu. Ne me akra xũmre atajê ajwar mehhi, ne Pahpãm jàmçjĕnxà te hajÿar, ne ramã ipictor tu. Ma Piritew catêjê te me hũtâr ne me to mō — hajÿr.

Ne cormã jũm tuw ita te Eri mã Pahpãm jàmçjĕn xàjarĕn, me ajkaam mã Eri te amji mã ipikrar, ne ihkrĭ xà pê catuat toihpÿm. Pê ramã ihwej ne ampeaj kam hicot, cwÿrjapê pêcatut to ihpÿm, ne imput kwĭn pyrentu ne ty.

9

Pê Pahpãm mehwÿ jō pahhi na Xawrō capi 1 Xamer 9.1-27; 10.1

Ne pê caku itajê nō kam Ixaher catêjê xũmre nō intuw ita japrÿ Xawrō. Ne pêhĭ to impeaj to impej, ne mehwÿ jirōa pê ihte ry ne ihhi ihtÿj.

Ne pê Xamer ata ajco Pahpãm kampa, ne ma mehwÿ mäharkwa jarĕ. Ne pê mam ramã amcro nō na, Pahpãm Xamer mã Xawrō to ihcakōc, ne cumã:

— Piritew catêjê te ame ikwÿ pê Ixaher catêjê to kêanre, mãcama ame amrã, wa ite mempar ne imã me caprĭ xà. Cwÿrjapê wa ha amãjũm xũmre kujate, wa ha me ikwÿ jō pahhi catia na hãm xà caxuw. Ite ramã amji mã capi, mâr quĕ taa me hũtâ — hane.

Ne pê amcro nō na Xawrō pãm ata ma Xawrō me, cumã hàpĕn catê ita me ajwar ihkujate, por cawrō cahàcre pictor ata japĕn to. Pê ma Xawrō me hũm mã hàpĕn catê ita ame cawrō cahàcre

japên to memõ. Ne ame mõi ita kam, Xamer me, cute me ajpên cajpar. Mã Xamer te Xawrõ pupun, mã Pahpãm cumã:

— Pom hũmre ita wa ite amji mã capi, ne amã harẽn. Ne cupêa quê ha meikwỳ jõ pahhi, ne me to ihmipej — hajỹr.

Mã Xamer te Xawrõ me, hũm mã hàpên catê ata me ajwar cute me haprõr, ne ma amjikĩn cati nõ ata wỳr me to mõi, ne me to cator. Ne mehkrĩ xà impeaj nõkam cute Xawrõ jỹr, ne hàwmrõ catê mã harkwa hyr, quê hõ nõ impeaj to hỹrmã mõi.

Mã Xawrõ Xamer cahê na hàpàn, jirõ pê mã ri ma Xamer hũrkwa wỳr Xawrõ to mõi, cute curi cahê na hõt prãmte. Ne caxwa ri jỹ neajpên mã amehcakõc, ne nõ ne me hõt. Mã irarà na Xamer jỹr ne ma põmã, krĩ pê, Xawrõ to cator, ne cumã:

— Pahpãm te imã acaxuw ampo jarẽn xà ata ri, ite amã harẽn xà — hane. Ne cute ampo cacõ impêti, incoti itacaxàr ne ihkrã kam haxwỳr, ne to impê, ne me ajpên pỳn, mã cumã:

— Ampo na mã wa apu ato hane? Nee mãampo na nare. He Pahpãm te ri Ixaher catêjê jõpahhi na amji mã acapi, ne harkwa kõt wa apu ato hane — hajỹr. Ne ma me ipicapõn.

Mã Pahpãm te Xawrõ mã cute amji kam hapac xà intuwti jõr, mã ihtỳjPahpãm kampa. Mã jũ mã ahna amcro te, mã cute pahhi na amji ton, ne caku jàhtõa kam ajco Ixaher catêjê to ihmipej to ipa. Ne caku jàhtõakam, cute me curê xwỳn pê mehkwy jũtår. Ne pê cute amji to cati prãmte, tàkamrỳ amji pê Pahpãm to hapac kêt to mõi.

15

Pê Pahpãm Xawrô jaxà kam pahhi na Tawi capi

1 Xamer 15.11; 16.1-13

Pê ajkĩ Xawrô nee Pahpãm jarkwa kôt ipa nare, ne amjia kôt ipa. Napê jũ mã ahna caku jirô pê mã, Pahpãm te Xamer mã amji jarên to:

— Wa ite Xawrô to pahhi ita jũ na ri ipeacre. Ampo na? Nee iparnare — hajÿr. Mã Xamer mã amji kĩn nare, mã cutePahpãm mã Xawrô cajrëan to apê. Mã Pahpãm cumã:

— Wa ramã ite pahhi tète Xawrô camên ita kam, Xamer, jũ caxuw ca hahũ na apec jicu? Ca ha ma ampo cacô incoti ata nõ py ne to tẽ, Pãw jõ krĩ wÿr. Ne to acato, ne curi me hũmre nõ japry te Jexê itana ahcukij, nãmri ramã ite pahhi na amji mã mehkra nõ ata capi, quê ha jũ caxuw Xawrô tyc xà jirô pê ihtÿj haxà kam axà, ne amji topahhi — hajÿr. Mã cute impar ne ampo cacô incotiita pyr, ne ma Pãw jõ krĩ wÿrto tẽ ne to cator.

Mã curi pahhi catêjê te ihcajpar prãmte hÿrmã mepra, ne mehcukij to:

— Hàpà ijõ pahhi! Ampo wÿr mã ca mõi? — hajÿr. Mã Xamer me cumã:

— Hamreare, ite cama Pahpãm mã ampo jõr xà jõ amji kĩn wÿr wamõ. Ne ate Pahpãm to amji kam gapac prãmte, ca ate to amji kamgapac xà itajê cunea to amji mã ahcuprõ ne to amji cũmpej, neajpên ikôt amji kĩnwÿr me mõi — hane. Ne ma cute Jexê jũrkwa na hàhcukjêr, mã cute me cumã harên.

Mã ma hÿrmã mō ne hàr, ne cute mehkra to cuprōn na mēn, quē me to cuprō, ne amehcūmpej. Mã Jexê te mehkra to cuprōn, mãXamer te mam kà ita pupun, ne amji mã:

— Pom ita mōrmō Pahpãm te amji mã capi — hajÿr.

Mã Pahpãm cumã:

— Hamreare, nee ipê me axūmre pyrác nare. Wa nee mehkucpupun xà kôt, jūm te amjikam hapac xà na hahkre pej nare. Ne me hūmre ri mehkuc pupun xà kôt, hãnne cute amji kam hapac xà na me hahkre pej. Ne pa wa quêt me caxwãm pê, cute me amji kam me hapac xà kôt, mehahkre pej — hane.

Jirô pê mã ri hipêr Jexê te mehkra kwÿ pyxwÿr, Xamer kuc ri, mã ame ipa. Mã Pahpãm Xamer mã:

— Por wa ite amji mã capi ata, nee ita ri apu mōr nare — hane.

Mã Xamer te Jexê mã harkwa to:

— Xà ajkĩ me akra itajê pit? Nãmri Pahpãm te nee amji mã itajê nō capi nare. Xànee cormã jūm apu mōr nare? — hajÿr.

Mã Jexê cumã:

— Cormã intuwre japrÿ te Tawi ita pit apu mō. Ne nee ita ri apu mōr nare, ma pō pê apucarà cahàcre jamãr to mō — hane.

Mã Xamer cumã:

— Hÿrmã garkwa kujate quē me haprô, ne me to cato. Cuha nee cormã ne me pajàpàn nare. Quē ha xa cato, cu ha cormã me apà — hane.

Mã Jexê te Tawi japrôr na harkwa. Ne pê ampeaj kam Tawi ata impej. Mã cute me haprôr

ne me to cator, mã Pahpãm te Xamer mã harkwa to:

— Ita wa quêt ite amji mã capi he. Ne ihkrãa kam ca ha ampo cacô impêti, incoti ata jaxwÿ, cupê pahhi xà caxuw — hajÿr.

Mã cormã Tawiapu mehkjêjê cote na mōar kam, mã Xamer te ihkrã kam ampo cacô impêti ata jaxwÿr. Me ajkaam mã PahpãmCarō Pejti te cupê pahhi xà caxuw cumã cute amji jahkrepej catia ne hōr, ajpên amcro teamji to hapu na kjê atajê caxuw.

17

Pê Tawi Piritew catêjê jàprê xakat cura

1 Xamer 17.1-53

Ne pê Piritew catêjê ajco hō krãhtare to cuprō, cute Ixaher catêjê wÿr me mōr, ne me ipijapu prãmte. Pê Ixaher catêjê me Piritew catêjê ajco ajpên wÿr me ipa, ne ajpên jïkjê na caprũam wÿr meahwÿ.

Ne pê Piritew catêjê jōkrãhtare jō pahhi nō ita ihkàa to ihkà. Ne ihkà ita pê, ihhêj rÿmme ipijakrut te amji jikre kam mehcuhhê kà. Ne ampeaj kam ihtÿj nehàprê, ne haprÿ pê Gorijti. Ne ajco amcro cunea kam mehkwyÿ pê hapôj, ne ajco Pahpãm me Ixaher catêjê jō krãhtare na, hàprãr xàato me cumã akij, ne me cumã:

— Wa ha itÿj Piritew catêjê kôt ajpu, ne me ca, ca ha amji mã me jÿm xÿmre japê, ne me capi, quê me akôt ajpu. Ne quê ha jÿm icuranna, wa ha me icunea pê cama me amã me ijapên catêjê. Nãmri wa ha ite jÿm curan na, ca ha me acunea pê cama me imã me gápên catêjê. Ampeaj kam

wa me amã, ca ha me jũm xũmre ata mã me acato, wa haitỳj cume ajpu — hane.

Pê nee jũm Gorijti catihti ata me ipijapu naamji ton nare. Na pê amcro cunea kam ajco me ahna hàprãr to ipa.

Mã amcro nõ na Tawicuri cator, ne cute hàprãr xà ita na impar. Ne pê Tawi cormã intuwrecakrô, amji mã harkwa to:

— Wa ha itỳj cume ajpu. Wa hãn ne apu inxũ jõ carà cahàcre hõhti jamãr to ipa. Mã hãn ne rop jõkre hõhti me rop tycti, ihkur prãmtehỹrmã hapôj, wa itỳj ihcura. Na wa ha itỳj Piritew catêjê jàprê xakat ata to hanea. Ampo na? Cute Pahpãm tĩar cuna mã ihcakôckêanre. Ne Pahpãm ihtỳj hãn ne ropti atajê pê ipytà, na quẽ ha hanea ne ihtỳj Piritew catêjê nõ ita pê ipytà — hane.

Mã pahhi Xawrô te ita kam hapac, ne cama apu ajpẽn na Tawi me Gorijti jamã.

Mã Tawi tẽ ne caprũm kam cute kẽn crecrti to xĩc ne incwỳr, ne hõ kẽn cjên xà kam incjên. Ne cute hõ kôtàre pyr, ne hanea ne hũhkрана hũcapêr xà pyr, ne ma cuna mã to tẽ, ne Gorijti me cute ajpẽn cajpar.

Mã Gorijti te incryac kam cumã caràr, ne cumã:

— Xà ipê rop mã ca ajpẽn pĩ ita to pitmã iwỳr tẽ, pahte to papijapu xà itacaxuw? Jũ wỳr quẽ ha cõjkwa kam Apãm Cati ita atehcajpa, ne ipãm cati quẽ haitehcajpa, wa ha apu ato kêanre ne — hajỹr.

Mã Tawi te cumã caràr ne cumã harkwa to:

— Ca ajpên gō xwapo xwahhihti me gō kruwxwa to tē, ne pa, wa quêtijō Pahhiti carôt tÿjti pê Ixaher catêjê jō krâhtarejō Pahhiti jarkwa kôt awÿr tē. Ne itakam quê ha ijō Pahhiti ijûhkra mā gaxà. Wa ha acura, ne ihkôt akrâ jakep, quê ha ampo kên te mehtyc kur xà atajê gĩ me, gōkrâhtare itajê jĩ pin partu. Quê ha krĩ cunea kôt mehcunea me ijō Pahhitite Ixaher jō pjê kam me cahê na ipana me hahkre pej — hajÿr.

Mã ahna Gorijti jàhtêp. Mã hÿrmã Tawi picahur ne cute hō kên cjên xapĩn, kên nõ pyxit ne caxàr, ne hûhkra na hûcapêr xà ata kamhir, ne kam to hûcapêr. Mã kên ita te Gorijti kuc tÿj mã hàr, mãpjê kam ihkuc to ihpÿm. Mã Tawi te cupê hō xwapo xwahhihti atacaxàr, ne toa inxec, ne to ihkrâ jakep.

Mã Piritew catêjê te mehàprê xakat tyc na me hōmpun, ne ma ame prôt. Mã Ixaher jō krâhtarete me cumã me caràr, ne ma mehkôt me pra. Ne pry kôt cute me cahuc. Neihtÿj ajpên pê mehcuran to me mō, ne me haxôp to me mō, ne cute me hōkrĩa mã me haxàr. Mã hamre, pry kôt mehtyc me, me haxôp catêjê te ame hikwaati.

Pê Tawi Xawrô mã me hàprê catêjê kam jũ mã amji to putwÿyto, ne ajco me curê xwÿn catêjê jàhtôa ne me hipej.

18

Tawi me Jônata

1 Xamer 18.1-11; 20.1-42

Ne pê Jônata pê pahhi pê Xawrô kra xÿmre, ne Tawi me ajpên cajpa ne me ajpên pupu, ne me

cumã ajpën kîn hyre nare. Mã Xawrô te Pahpãm te Tawi to ipa, mã mehcunea mã ihkîn na, hahkre pej. Cwÿrjapê ri hũ na apu amji to prãm, ne apuTawi kam incryac to incryc, ne amcro cunea kam, kam incryc ita cumã ajcamẽ. Mã tee apu ihcuran to hahkre.

Mã Tawi te cupê amji pytâr, ne ma tẽ. Ne cute Jônata me ajpën cajpar, mã cute ihcukij ne cumã:

— Ampo to mã ite jũ na, mã apãm apu icuran prãm? — hajÿr.

Mã Jônata cumã:

— Hamreare, nee apu acuran prãm nare — hane.

Mã Tawi cumã:

— Quê! Ihtÿj icuran prãm! Ca ha hane ne hõmpu he. Apê quê ha putwrÿintuw jõ amji kîn. Wa ijõtpe gũrkwa ri apà, ne apê wa ha ma põ mãicato, ne jũ ri amxu. Quê ha apãm ina acukij, ca ha cumã itêm caprÿ na, ito ahêj ne cumã, wa ma inxũ jũrkwa ri amji kîn wÿr, Pãw jõ krĩ kam itêm na, ijarẽ. Quê ha cute ita na amji caxàr na, cu ha ramã ihcunea impeaj na hahkre pej. Nãmri quê ha cute ita na ikam incryc na, cu ha ramã cute icuran prãm na hahkre pej — hane.

Mã Jônata cumã:

— Imã inxũ tyc jakàn pê Pahpãm te ato pahhi na gahkre pej. Ne ipê pahhi kra cakrô, wa ha nee ipê pahhi nare. Na wa ha ampeajkam amã amji to, wa ha inxũ mã icakôc, quê ha cute apuakam incryc ne apu acuran prãm na, wa ha ma tẽ ne amã awjarẽ, ca ha hahkre pej, ne atÿj cupê amji pytà. Ne quê ha Pahpãm akôt ipato hanea, pom quê pê ajco inxũ kôt ipa he. Ne ca, ca ha cormã

itĩarkam ito impeaj ne, ne ityc jirô pê, ca ha hanea ne me ikra to impeaj ne, Pahpãm te amji mã ato ihhimpej xàa kôt — hane. Mã Jônata me Tawite ajpên par pejti to hajÿr.

Mã ma Tawi tẽ ne põ kam ipimxur. Mã amji kĩn kam hàhhuc, mã Xawrô pêpahhi ata hÿr xà ata kam hÿr, ikre kat na pire mã. Mã hanea ne Jônatahũm cuna mã hÿr, mã Tawi jÿr xà kam caprÿ. Ne hipêr amcro nõ na, cormã hÿr xà kam caprÿ ita na. Mã Xawrô te Jônata cukij ne cumã:

— Ampo na mã nee ihnõ kam ajpên Tawi mõi ne cute ampo krêr nare, ne itakam ajte cute hajÿar? — hajÿr.

Mã Jônata cumã:

— Tawi te iwÿr, wa ite to tojnõ mã ma Pãw jõ krĩ wÿr tẽ, me hũmjêwÿr. Curia quê ha apu amji kĩn ita toamji japackre — hane.

Mã Xawrô apu incryac to incryc necaràar kam cute Jônata mã harkwa to:

— Quê ha ihtĩar na ipa, ca ha nee jũ caxuw apê pahhi nare, ityc xàxwÿjrea na. Tẽ ne haprô, wa ha ihcura — hajÿr.

Mã Jônata te hũmjahkre pej, cute Tawi curan prãm na, ne ma me hàpàn xà pê incryac kamhãm ne tẽ. Ne nee hàpàn nare amcro ata kam. Ne amcro nõ na Jônata mapõ mã tẽ, ne cute Tawi me ajpên cajpar. Ne cute me ajpên cajpar xà atakam me ajwar me cumã amji kĩn nare, mã cama ame amrã. Mã Jônata Tawi mã harkwa to:

— Cu ramã pahte ajpên par to impejti, na ca ha gapacta ne apej pêa mãtẽ — hajÿr. Ne ma Jônata

hacpÿ mã krĩ mã cute amji jaxàr. Mã ma Tawi xwÿjê tẽ.

24

Pê Tawi mã Xawrô caprĩ

1 Xamer 24.1-22

Mã pahhi Xawrô ma Piritew catêjê me ipijapu to mõi, ne cute amji jaxàr. Mã cute me cumã Tawi te Engeti jõi põi kam apu ipa na harên. Mã Xawrô tekrãhtare impej to pit mãmir crê ne capi, ne ma hàhkà jakõtti nõ ita wÿr meto mõi, ne ame Tawi japê. Ne pea kên kre nõ ita mã me cator, mã kênkre ita mã Xawrô ihkwÿr prãmte hàr. Mã Tawi curia hanea ne hõ krãhtarete xêjxênta atajê to cute ipimxur ne to jÿ, mã nee Xawrô te me hõmpun nare.

Mã Tawi cahê na ame ipa atajê cama ame Tawi mã incryc tohahkre, ne me cumã harkwa to:

— Ita kam Pahpãm te amã acurê xwÿn ata jõi he, ca ha caa, ate jÿ naton xà nõ ata na to — hajÿr. Mã Tawi te amji mã ihprĩ, ne aracri Xawrôpê ihkà japjêhti ata kwÿ Jakep, ne nee cute ihcuran nare. Mã Xawrô kên kre pê cator, ne ramã hÿwryre.

Mã ihkõt Tawi cator, ne cute cumã caràr to:

— Hàpà, ijõ pahhi! — hajÿr.

Mã hÿrmã Xawrô pipkjêr ne cute Tawi pupun, mã cuna mã ihkuc to pjê kam ihpÿm, cute amji mã hÿpahti to prãm to. Ne cute cumã caràr to:

— Ampo na mã ca apu ite acuran na, cute me amã ito ihhêj catêjê kampa? Ita kam ateatoa to amehhêj xi xà ita na me hõmpun he. Pahpãm te kên kre ita kamijÿhkra mã gaxàr. Mã me ikwÿ

acuran na me imã awjahkre, wa nee ite ita ton nare.

— Pê Pahpãm amji mã pahhi na acapi, na wa nee ite acuran nare. Ne ijũhkra kam ca rĩt ne kam akà ita kwỳ pupu he. Ite cama apê ihkwỳjakep, ne nee ite to gaxôp nare. Quê ha Pahpãm ajpẽn na pahpupu, cu ha pahnõ te ajpẽn to kên na, quê ha Pahpãmmapu pahnõ to kên — hajỹr.

Mã Xawrô te cumã harkwa to:

— Xà Tawi ca mã ca? — hajỹr. Ne cama ihpahãmte apu amrã, ne hipêr cumã:

— Ijirôa pê apê me hũmre impejti nõ. Ampo na? Wa ite, atè ito impejti na, gahkre pej. Na ca ha atỳj jũ caxuw apê Ixaher catêjê jõ pahhi — hane. Ne ma Xawrô te amji jaxàr ikre wỳr. Mã ma põ kam, kẽn kre wỳr Tawi te amji jaxàr.

31

Tawi pê Pahhi tuw

1 Xamer 31.1-6; 2 Xamer 5.1-5

Mã caku nõ na Piritew catêjê hipêr apu Ixaher catêjê japu, nemehcuran to mõ. Mã Ixaher catêjê jõ krãhtare kwỳ ma me pra, mã Gipôw jõ kenti na, cute hipêr mehkwy curan. Ne Piritew catêjê te hanea ne pahhipê Xawrô me, mehkra mea mã mehkra, ne cute me hipej prãmte me kam mehtêm. Ne cute me Jônata me, mehkjêjê curan ne me Xawrô caxwỳr neme haxôp, ne ma me pra, ne ihtỳj ihtyc na amji mã me to hane. Mã ihtĩarcormã nõ, ne cutea hõ xwapo xwahhihti to amji curan ne ihtyc.

Jirô pê mãri ma Tawi wÿr, Ixaher catêjê jakrã jõ pahhi catêjêcunea me pra, Heprõm jõkrĩ kam, ne cute me cumã amji jarën to:

— Ipê me akwÿa wa me, pê Pahpãm ramã apê pahhi na ato ihcakôc. Na caha apê me ijõ pahhi, ne ma me ijamãr catê na amji to — hajÿr. Mã Tawi te Pahpãm kam mare mã, mehwÿ mã amji to ihmipej to intuw, mã cute me toIxaher catêjê jõ pahhi. Pê Tawi me to ihmipej ita to caku to cwarênta.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a